

प्रादेशिक समाचार  
आकाशवाणी जयपुर-अजमेर

दिनांक 09.09.2024

समय: 18.45 बजे

000000

- केन्द्र सरकार राज्यां अर केन्द्र शासित प्रदेशां ने **मंकीपॉक्स** रा अंदेशा रा सगळा मामला री जांच अर परीक्षण करावण ने कह्यो ।
- बीकानेर री महाजन फील्ड फायरिंग रेंज मांय भारत अर अमेरिकी सेना रो भेळो युद्धाभ्यास सरू ।
- शिक्षा मंत्री मदन दिलावर झालावाड़ ऊं **“प्रखर राजस्थान रीडिंग अभियान”** री सरूआत करी ।
- प्रदेश मांय केई ठौड़ां बिरखा थमण रे पछे धूप खिलण ऊं आराम-सिंज्या फेरू बिरखा सरू-आवता चार-पांच दिन अगूणी ज़िला मांय तेज बिरखा रो दौर चालतो रेहवण री आस ।

0000

केन्द्र राज्या अर केन्द्र शासित प्रदेशा ने मंकीपॉक्स बीमारी रा सगळा अंदेशा वाळा सगळा अंदेशा वाळा मामला री जांच अर परीक्षण करण ने कह्यो है । केन्द्रीय स्वास्थ्य सचिव अपूर्व चंद्र मंकीपॉक्स रा बारा मांय विश्व स्वास्थ्य संगठन री अंतर्राष्ट्रीय जन स्वास्थ्य आपात घोषणा ने देखता सलाह काढी है । मंत्रालय आप री सलाह मांय मंकीपॉक्स ने ले र सावचेती बधावण अर लोगां मांय उपज्या डर ने रोकण सारू निवाराक उपाय अपणावण जोर दियो है । मंत्रालय रा ठावा अहलकारां कानी ऊं राज्य अर ज़िला थर माथे स्वास्थ्य सुविधा खास कर ने जनस्वास्थ्य ऊं जुड़ी तैयारियां री समीक्षा करण री ई सलाह दी है । राज्यां ने अंदेशा अर ऐलाण दोन्यू मामला री देख-रेख सारू अस्पताला मांय आईजोलेशन सुविधावां अर जरूरी लॉजिस्टिक्स अर प्रशिक्षित मानव संसाधना री मौजूगदी पहचाण करण ने ई कह्यो है । स्वास्थ्य कर्मियां खासकर ने चर्म, यौन संचरित बीमारियां रा क्लीनिक अर राष्ट्रीय एडस नियंत्रण संगठन रा क्लीनिक ने स्वास्थ्य प्रोटोकॉल

री पालना करण ने कही ज्यो है। श्री चंद्र कह्यो के केन्द्रीय स्वास्थ्य मंत्रालय आ हालात माथे निजर राखतो रहवेला अर राज्या अर केन्द्रशासित प्रदेशा ने हर जरूरी मदद देवेला।

000

प्रधानमंत्री टीबी मुक्त भारत अभियान री दूजी वर्षगांठ आज चिकित्सा अर स्वास्थ्य मेहकमां कानी ऊं **‘नि-क्षय मित्र बनाएं—टीबी हराएं’** अभियान सरू व्ह्यो। मेहकमां री प्रमुख शासन सचिव गायत्री राठौड़ पोस्टर विमोचन कर ने अभियान री सरूआत करी। ओ अभियान 2 अक्टूबर ताई चालेला। प्रदेश मांय क्षय उन्मूलन कार्यक्रम रे तैत हासिल कामयाबियां री सराहवणा करता ई कार्यक्रम ऊं जुड़ी गतिविधियां ने ओर बधावण रा निर्देश दिया। निदेशक जनस्वास्थ्य डॉ. रवि प्रकाश माथुर बतायो के अभियान रे तैत टीबी उन्मूलन सारू जन समर्थन हासिल करण रा मकसद ऊं काले ग्राम पंचायता मांय सामुदायिक मीटिंग व्हेला। टीबी रोग रा अंदेशा वाळा लक्षण वाळां मरीजा री जांच करी जायेला अर प्रचार प्रसार गतिविधियां व्हेला।

000

राजस्थान मांय बीकानेर री महाजन फील्ड फायरिंग रेंज मांय आज भारत अर अमेरिका री सेना रो भेळो युद्धाभ्यास सरू व्ह्यो। आज संवारा साढे दस बज्यां परेड जळसा रे साथे युद्धाभ्यास रो आगाज व्ह्यो। भारत री दक्षिण-पश्चिम कमान रा 600 अर अमेरिका रा ई इतरा ई जवान हिस्सो ले रह्या है। दोन्यू देशां रा जवान मिल ने 15 दिन ताई केई युद्ध रणनीतियां रो अभ्यास करेला।

.....

000

शिक्षा मंत्री मदन दिलावर आज झालावाड़ जिला रा कनवाड़ी रा सरकारी सीनियर सेकेण्डरी रूकूल ऊं **“प्रखर राजस्थान रीडिंग अभियान”** री सरूआत करी। ई मौके श्री दिलावर कह्यो के प्रदेश रा टॉबरां ने किताबा ने धारा प्रवाह पढणो सिखावण सारू ओ अभियान सरू करी ज्यो है। ओ अभियान 2 अक्टूबर ताई चालेला। वणा कह्यो के ई अभियान रे तैत प्रदेश रा 65 हजार स्कूलां रो कोई 80 लाख टॉबरां ऊं किताबा पढवाई जायेला। शिक्षा मंत्री बतायो के अभियान रो

मकसद पैली ऊं 8 वीं कक्षा ताई रा पढेसरां मांय किताबा पढ़ण रो हुनर विकसित करणो है। राजस्थान स्कूल शिक्षा परिषद् रा उपनिदेशक नादान सिंह गुर्जर बतायो के ई अभियान रे तैत पुस्तकालय दिवस अर हिन्दी दिवस मनाया जायेला। वटे ई स्कूलां मांय कविता अर कहाणी सुणावण रा कार्यक्रम ई व्हेला।

000

सूचना अर प्रसारण मंत्रालय कानी ऊं जयपुर मांय आज दो दिन री सामुदायिक रेडियो जागरुकता कार्यशाला सरू व्ही। कार्यशाला रा उद्घाटन मांय पत्र सूचना दफ्तर पी.आई.बी. री अपर महानिदेशक जयपुर रीजन ऋतु शुक्ला मौजूद री। **सीकिंग मॉडर्न एप्लीकेशन फॉर रियल ट्रांसफॉर्मेशन संस्था** री मदद ऊं व्हे री कार्यशाला मांय प्रदेश रा न्यारा—न्यारा अंचला री गैर सरकारी संस्थावां अर शिक्षण संस्थावां रा नुमाइन्दा हिस्सो ले रह्या है। मंत्रालय रा अतित्तिक निदेशक गौरीशंकर केशरवानी बतायो के समुदाय रा विकास मांय सामुदायिक रेडियो री महताउ ठौड़ है अर ई बारा मांय न्यारा—न्यारा हितधारका ने जागरुक करण सारू कार्यशाला व्हे री है।

00000

प्रदेश मांय लारला दिनां ऊं चाल री तेज बिरखा ऊं आज आराम मिल्यो है। फेरू ई कुछ ज़िला मांय आज ई हळका ऊं मझला दर्जा री बिरखा व्ही है। केई ज़िला मांय मौसम साफ होवण ऊं आज सूरज रा दरसण व्ह्या जिण ऊं लोगां ने आराम मिल्यो, सिंज्या व्हता—व्हता केई ठौड़ां फेरू बिरखा व्ही। केई ज़िला मांय लारला दिनां व्ही बिरखा ऊं पाणी भराव रा हालात बण गया है। अजमेर रा निचला हलका मांय अजै ई पाणी भर्यो है अर प्रशासन पाणी निकाळण री कोशिश कर रह्यो है।

.....

दौसा मांय तीन दिन पछे आज बिरखा रो सिलसिलों थम ग्यो फेरू ई बंधा मांय पाणी री आवण व्हे री है। करौली मांय पांचना बन्धा मांय ऊं दो गेट खोल ने पाणी री निकासी करी जाय री है। सलूमबर ज़िला मांय एक हफ्ता ऊं व्हे री बिरखा ऊं नदी नाळा अर तलाब मांय पाणी री आवक व्हे री है। केकड़ी जिला मांय घणी बिरखा होवण ऊं उन्हाळू साख री फसला खराब व्हे रही है। डीग मांय मॉनसून सीजन मांय रिकॉर्ड तोड़ बिरखा रे कारण जिन्दगी माथे असर

पड्यो है। जयपुर रा कुछ हलकां मांय आज हळका ऊं मझला दर्जा री बिरखा व्ही। मौसम मेहकमो कह्यो है के आज कोटा, उदयपुर, जयपुर, जोधपुर, भरतपुर अर अजमेर संभाग रा कुछ हळका मांय मझला दर्जा री बिरखा अर कोटा, उदयपुर संभाग मांय कठे—कठे ई भारी बिरखा होवण री आस है। मौसम मेहकमां रा निदेशक राधेश्याम शर्मा बतायो के आवता चार—पांच दिन अगूणी ज़िला मांय अजै ई मझला दर्जा ऊं भारी बिरखा होवण रा आसार है।

.....

000

लोकसभा अध्यक्ष ओम बिरला आज बाबा रामदेव री समाधि रा दर्शन कर ने देश—प्रदेश मांय अमन, चैन अर खुशहाली री कामना करी। लोकसभा अध्यक्ष लोकदेवता बाबा रामदेव री खास पूजा अर्चना करी। बाबा री समाधि पूगण माथे मिंदर समिति रा ओहदादारा श्री बिरला रो स्वागत कर्यो। समिति कानी ऊं श्री बिरला ने बाबा रामदेव री मूरत भेट करी ज्यी।

000

सरिस्का रा पांडुपोल हनुमान मिंदर मांय आज ऊं मेळो सरू व्हयो। केंद्रीय मंत्री भूपेंद्र यादव अर राज्य रा वन अर पर्यावरण मंत्री संजय शर्मा अर नेता विपख टीकाराम जूली मेळा री सरूआत करी। तीन दिन रा ई मेळा मांय लाखो लोग दर्शन सारू आवेला।

000

धौलपुर ज़िला मांय कौमी एकता रा प्रतीक मचकुण्ड तीर्थ मांय आज देव छठ रे मौके श्रिद्धालुआं रो सैलाब उमड्यो। म्हाणा धौलपुर खबरनवीस बतायो के मचकुण्ड तीर्थ माथे उर्स अर लंगर रा आयोजन साम्प्रदायिक सौहार्द ने बधावो देवण मांय महताउ भूमिका निभा रह्या है।

.....

00000